
ФАРҒОНАДА “ЭНГ ЯХШИ ИЖТИМОЙ ТАШАББУС” ҲАМДА “МАҲАЛЛА – БЕШ ТАШАББУС БЕШИГИ” РЕСПУБЛИКА КЎРИК-ТАНЛОВЛАРИ ҒОЛИБЛАРИ АНИҚЛАНДИ

Фарғона шаҳридаги Ислом Каримов номидаги театр-концерт саройида Олий Мажлис Сенати томонидан ташкил этилган “Энг яхши ижтимоий ташаббус” ҳамда “Маҳалла – беш ташаббус бешиги” Республика кўрик-танловларининг вилоят босқичи бўлиб ўтди.

Мазкур кўрик-танловлар Ўзбекистон Республикаси Олий Мажлис Сенати ташаббуси билан ташкил этилди. Танловларнинг туман-шаҳарлар кесимида ўтказилган ҳудудий босқичларида ғолибликни қўлга киритган 100 нафарга яқин иштирокчилар унинг вилоят босқичида қатнашдилар.

Улар “Энг яхши ижтимоий ташаббускор давлат бошқаруви органи”, “Энг яхши ижтимоий ташаббускор нодавлат-нотижорат ташкилоти”, “Энг яхши ижтимоий ташаббускор тадбиркорлик субъекти”, “Энг яхши ижтимоий ташаббускор фуқаро”, “Энг яхши ижтимоий ташаббускор ҳокимлик”, ҳамда “Маҳалла-беш ташаббус бешиги” каби 6 та йўналиш бўйича ўз имкониятларини синовдан ўтказдилар.

Ҳакамлар ҳайъати ғолиблик сари интилаётган ҳар бир иштирокчи билан яқиндан суҳбат қуриб, уларнинг меҳнат фаолияти, амалга оширган ишларини акс эттирувчи фотоалбом ва видеолавҳаларига эътибор қаратдилар. Ўз навбатида лойиҳалар, ташаббуслар, эзгу саъй-ҳаракатларнинг истиқболига юзландилар.

Танловнинг аҳамиятли жиҳати шундай иборатки, унда қатнашаётган ҳар бир иштирокчи ўз ҳудудининг миллий урф-одатлари, ривожланиш ва ўсиш суратларини акс эттирувчи кўргазмаларини ҳам намойиш қилишди.

Ҳар бир ғоянинг долзарблиги, амалиётда татбиқ этилган саъй-ҳаракатларнинг ижобий кўрсаткичлари танлов сўнггида сарҳисоб қилинди.

Шундан сўнг қатнашчилар вилоят ҳокимлиги ҳамда халқ депутатлари вилоят кенгашининг ташаккурнома ва совғалари билан рағбатлантирилди. Ҳар 6 та йўналиш бўйича 1-2-3-ўрин совриндорларига ташкилотчиларнинг диплом, қимматбаҳо совғалари топширилди.

Ғолиблар эндликда танловнинг Республика босқичларида вилоятимиз шарафини муносиб равишда ҳимоя қиладилар.

Шу куни санъаткорлар томонидан концерт дастурининг намойиши маросимга янада ўзгача шукуҳ олиб кирди.